

Præfatio ad DD. Auditores.

DUdum expetivistis, DD. Auditores, à me meas Institutionum Justinianearum ad principia Juris practici reductarum, nec non cum Jure patrio pro modulo meo collatarum quales quales prælectiones superioribus annis habitas; Terruit me quidem primâ fronte & ferè absterruisset, quod Tantis Mantzius in præfatione ad inst. de suo nunquam satis deprædicando opere vaticinatus est vaticinium: *Plura adhuc eventura prædicere possem, è quibus id solùm addo, tot me censors habiturum, quot lectores*; Nisi me hoc unicum exstimulasset, dedignaturos suâ lectione & censurâ hunc meum libellum veteranos, relinquentesque esse pagellas meas principiantibus. Manum itaque quantum per proximas autumnales ferias à Clientum patrociniis, quibus non rarò distentus fui, vacare mihi licuit, lucubrationi applicui, ratus, Mandato D. Imp. Justiniani in §. 2. *Inst. de J. & J. commodissimè satisfactum iri, si Jura populi Romano-Germanici primò levi & simplici viâ, & post deinde exactissimâ interpretatione traderentur, nec non exponeretur, & quod antea obtinebat, & quod postea desuetudine inumbratum Imperiali remedio illuminatum est. Hoc præcipiente Imp. in præm. §. 5. Modo scribendi* utor plano, & brevi, neglecto verborum strepitu; definitiones & descriptiones plerumque retineo Justinianeas, nisi ubi Imperii nostri mutata facies alias requirit; autoritatibus nititur tum classicorum quotidianorum, tum, ubi materię dignitas hoc exigit, gravium Doctorum practicum Germaniæ; à cumulo autoritatum & legum farragine consultò abstineo, textus punctuales tantum allegando; procedo per illationes & Cõrollaria, ut memorię sim ministerio; Sententias si non textu, saltem ratione à viris practicis probatâ firmo; ob temporis tamen angustias, & ne leges compendii excedam, opiniones meas sæpius non evacuo; sed easdem coràm discutiendas nonnunquam mihi reservo eâ spe fretus & fiducia, me mentem Imp. ope D. Virginis Deiparæ hac methodo, si non proximè, saltem eminè affecuturum. Vos interim DD. Auditores labore meo utamini fruamini, & cum nihil humani à me abesse putem, lapsibus ignoscite, & valete.

Pros.